

# स्हारे दी तलाश च कास्तू “कास्तू दा काला तित्तर” दी मुख्वा नायिका दी समस्या

□ डॉ० सत्यपाल श्रीवास्तव

स्वर्गीय नरेन्द्र खजूरिया डोगरी दे जाने, माने कहानीकार हे। अपनियें सफल कहानियें दे कारण उ'नें बड़े थोड़े समें च गै डोगरी कथा-साहित्य च अपना खास थाहर बनाई लेआ हा। उं'दिएं कहानियें च डुगर समाज दी वेदना, मनो-विज्ञानिक विश्लेषण ते राष्ट्र-प्रेम दी भावना दा बड़ी सूझबूझ कन्नै चित्रण कित्ते दा ऐ। कहानीकार नरेन्द्र दी सफलता दा प्रमाण उ'नें गी साहित्य अकादमी कोला मिले दा सम्मान ऐ (मरणोपरान्त)।

इस लेख दा बिशे उं'दी कहानी “कास्तू दा काला तित्तर” दी मुख्वा पात्र कास्तू ते उसदी समस्या सहारे दी तलाश ऐ।

कास्तू सहारे दी तलाश बास्तै अपनी चतरफा फैली दियें परिस्थितियें दे उतार-चढ़ाऽ कन्नै लगातार लड़ाई लड़दी जंदी ऐ। उस दिया दुनियां च केई मोड़ आँदे न जिं'दे कन्नै उस्सी नमें-नमें अनुभव होंदे न-“कास्तू दी दुनिया गोल नेई लम्मी ऐ जेहदे कदम-कदम पर मोड़, मोड़ ते पही मोड़ न, हां उ'नें मोड़ें उप्पर उन्ने इक नमां जीन भोगे दा ऐ।”

अपने पति फामी गी फांसी दा हुक्म मिलने दे कन्नै गै कास्तू दी बदकिसमती दा ध्याऽ शुरू होई जंदा ऐ। उस्सै दिने कोला ओह अपने भाग गी बदलने आस्तै संघर्ष शुरू करी दिंदी ऐ। ओह कठन मैहनत करिये रपेऽ किट्टे करिये बकील करदी ऐ, दालती च पुजदी ऐ ते दाद-फरियाद बी करदी ऐ मगर उसदी सारी मैहनत बेकार चली जंदी ऐ। खीर उसदे पति गी फांसी होइयै गै रौह्दी ऐ ते इ'यां' उसदी अपनी बदकिसमती दे अगै करारी हार होई जंदी ऐ। उस दिनें कोला उसदे पर बदकिसमती चोटें पर चोटं मारना शुरू करी दिंदी ऐ। उसदी बेबसी दा फायदा ठोआइयै सुरगल देवता दा चेला जगतू बरोआला उसदे सतीत्व गी सुरगल देवते दी आहड़ बिच लुटने आस्तै नेकां दाऽ खेढदा ऐ ते खीर इक दिन भुक्खे दे शरे आह्ला लेखा उसदे पर अपना खुंखार बार करी गै दिंदा ऐ, लेकन कास्तू दी गैरत् उसदी इज्जत गी बचाने आस्तै ललकारी उठदी ऐ। उसलै ओह जगतू बरोआले दे बाल पकड़ियै गर्जदी होई आखदी ऐ-“ओ बरोआलेआ, तेरियां बावरियां गै नेई आत्मा बी काली ऐ। तूं केह मिथियै मिगी हत्थ पाया ? भकड़ा, मेरे म्हाशे ने किट्टे दो खून कित्ते हे, ते पापिया, इक खून करने जोगा जोर ते अजे मेरे बिच बी ऐ।”<sup>2</sup>

कास्तू दे इ'नें शब्दे च यकीनन गै इक विधवा दी बेबसी गै नेई बल्के आतम-सम्मान रक्खने आहली नारी दी सतीत्व शक्ति बी ललकारदी सेई होंदी ऐ। उसदे एह शब्द समाज दे बदमाश फिरके आस्तै इक चुनौती न ते कन्नै गै एह समाज दे बेस्हारा स्त्री-समाज गी अपने आपे गी बचाई रक्खने आस्तै प्रेरणा बी दिंदे न।

स्हारे दी तलाश च निकली दी कास्तू छौंकू चौकीदारे दा सच्चा प्यार पाइयै उसदे अगगै आतम समर्पण करी दिंदी ऐ लेकन जगतू बरोआला एह दिक्खियै अगग-बबूला होई जंदा ऐ। ओह अपने पाखंड-वाद दा खुल्लियै प्रदर्शन करदा ऐ। ओह सुरगल देवते दी दुहाई देइयै ग्रां दे अनपढ़ लोकें दे मनै च एह विश्वास पैदा करने दी कोशश करदा ऐ जे कास्तू सधारण जनानी नेई ऐ बल्के बड़ी खतरनाक जादूगरनी ऐ। बल्लै-बल्लै ग्रां दे तकरीबन सारे गै लोक एह विश्वास करन लगी पौंदे न जे सच्चै गै कास्तू जादूगरनी ऐ। इन्नै तक जे छौंकू दी मां बी लोकें दी झूठी चर्चा पर विश्वास करियै उसी जादूगरनी समझन लगी पौंदी ऐ। कास्तू दे भागें दी इस थमां बड्डी बिडम्बना होर केह होई सकदी ऐ? पर इ'नें समस्याएं कन्नै लड्डी होई बी ओह अपनी मंजला उप्पर कदम बधांती गै चलदी ऐ।

इक दिन कास्तू दा दूआ पति छौंकू बी उसदा साथ छोड़ियै इस दुनियां थमां कूच करी दिंदी ऐ। उस बचारी पर एह दूई बड्डी चोट होंदी ऐ लेकन हून ओह किल्ली नेई ऐ। उसदिया गोदा च हून इक सुन्दर न्याना ऐ जेहड़ा उसदा इक मात्र स्हारा ऐ। इससै आस्तै उस्सी अपने अगले जीवन दे बारे च कोई चिन्ता नेई ऐ, मगर समाज उस्सी कुत्थे चैन कन्नै बौहन दिंदी ऐ। पखंडी जगतू बरोआले दा अन्ध-भक्त समाज उस्सी छौंकू दी हत्यारनी समझन लगी पौंदा ऐ। इक पासै चले दे झूठे भेश बिच एह कामी ते पखंडी जगतू बचारी कास्तू गी डैन ते पतिघातन सिद्ध करने दी कोशश करन लगी पौंदा ऐ ते स्वर्गवासी छौंकू दी मां इसदा समर्थन करन लगी पौंदी ऐ ते दुरे पासै ग्रां दी पन्चैत इससै पक्ख दे हक्क बिच फैसला देइयै बेस्हारा कास्तू गी अपना ग्रां छोड़ने आस्तै मजबूर करी दिंदी ऐ। एह उसदे उप्पर इक होर बज्र-पात हा। डॉ० गंगादत्त विनोद इस बारे च ठीक गै आखदे न-“कास्तू के जीवन के साथ दैनिक संघर्षों और समस्याओं का गठ-जोड़ करते हुए लेखक ने समाज के उपेक्षित वर्ग के प्रति अपनी सहानुभूति दिखाई है।”

इ'यां निर्देई समाज दे अत्याचार भरी नासमझी दा शकार होइयै कास्तू हून बस्ती कोला दूर ग्रां दी इक गुफा बिच अपना आसरमां तुप्पी लैदी ऐ। उत्थै उसदा इक मात्र स्हारा उसदा न्याना पुत्तर कोडू गै होंदा ऐ। उसदी बदकिसमती दी इन्तहा एह ही जे जगतू बरोआले दा उसदे बरखलाफ क्रूरतापूर्ण प्रचार हून बी उसदी खलासी नेई छोड़दा ऐ। ओह जियां-कियां कास्तू दे उप्पर गलबा पाइयै अपनी अनतृप्त-काम वासना गी शान्त करना चांहदा, उ'आं उ'आं गै असफल होंदा जंदा ऐ, पर इ'यै कारण ऐ जे कास्तू दा जीवन होर बी दुखी होंदा जंदा ऐ। कास्तू जगतू दा नांऽ जाद करदे सार गै उसदे नांऽ पर थुक्कन लगी पौंदी ऐ। उस्सी दुत्कारदी ऐ ते फटकारदी ऐ ते रोहै च आइयै अपने गै बाल पुट्टन लगी पौंदी ऐ। अपनी बेबसी गी

जाह्र करने आस्तै ओह होर करी बी केह सकदी ऐ? इस थमां बी भावावेश च औने पर उसदे मुहां दा चानक निकली पौंदा ऐ “ओ बरोआलेआ, गुगल धूफे दी वाशना च खटोए दा तेरा असली रूप मैं पछाननियां। तेरी गर्की दी आतमा गोहटें दे कीड़े थमां बी मता नरक भोगे दी ऐ। पापिआ, तेरी देह लोहे दे झुंडे खाई-खाई सगुवां होर मतीचथोड़ होई गेदी दी ऐ।”

अगँ चलियै कास्तू दा चरित्र इक बारी पही इन्सानी कमजोरी दी शकार होई जंदा ऐ। अपने न्याने पुतर कौडू दा सहारा पाइयै बी ओह इक अभाव जां घाटा मैसूस करदी गै रौहदी, जिसदी पूर्ति ओह कांसू दा सहारा पाइयै करना चाहन्दी ऐ। समाज ते खासकरियै जगतू बरोआले दियां चब्भां, निंदां ते झूठे दोषारोपण बगैरा दी परवाह कित्ते बगैर ओह इक बारी पही अपना घर बसाने आस्तै तड़फन लगी पौंदा ऐ। इस कोला उसदी बरोधी परिस्थितियें कन्नै संघर्ष करियै अपने लक्ष्य तक पुज्जने दी तांहग पूरी करने दी निर्ने बुद्धि दा पता चलदा ऐ। कास्तू दे सामनै दो गै रस्ते न-संघर्ष करदे होई अपने लक्ष्य पासै बधना ते उसी प्राप्त करना जां हार मन्नियै अपना सम्मान बी गुआई देना। पर समाज च अपने जनेहियें नेकें नारियें दे वर्ग दी प्रतिनिधि कास्तू दा परिस्थितियें कोला हारियै नस्सी जाना कहानीकार गी कदें बी परसिंद नेई ऐ। ओह इस्सै आस्तै उस्सी पलै-पलै नमें-नमें संघर्ष आस्तै धकेलदा होआ उस्सी उसदे लक्ष्य पासै बधाने दे कन्नै-कन्नै कथा-प्रवाह गी बी गतिशील बनाई रखदा ऐ।

कास्तू दा नमां सहारा कांसू आपू इक निराश्रत ते बे-सहारा आदमी ऐ। उसदा नां कुतै घर ऐ ते नां गै कोई जैदाद ते नां गै सज्जन-सरबंधी। झूठियां-गुआहियां देइयै ते शराब बेचियै अपनी पेट-पालना करनी उसदा रोजे दा धंदा ऐ। आपू बी बेत्हाशा शराब पीऐ रोज बरोज ताहीं-तुआंहीं ढौना-पौना उसदा आम कम्म ऐ। कहानीकार दे शब्दें च-“ढौना-पौना ते उसदे आस्तै चबात नेई हा। जिंदगी बिच ओह चलेआ घट्ट ते ढट्टा मता हा।”

इक बारी ओह जदूं मता पीऐ मरने आह्ला होई गेआ हा तां कास्तू ने अनथक मैहनत करियै ते उसदी सेवा करियै उसदे प्राण बचाई ले हे। इस कन्नै कांसू उसदे आस्तै कृतज्ञता दे बोझ कन्नै दबोई जंदा ऐ। इस्सै लेई ओह आखदा ऐ- “इस बारी ते तूं तली देइयै बचाई उड़ेआ ऐ,” पर जीवन कोला नराश कास्तू दे दुखें ते क्लेशें कन्नै भरोचे दे हिरदे च समाज दे प्रति इक रोह भरोची दी खिंझ दे सुआऽ किश बी नेई ऐ। इस्सै बास्तै ओह जवाब च आखदी ऐ-“आऊं बचाने आहली हुंदी तां अपने म्हाशे ते चौकीदारे गी नेई बचाई लेंदी। मैं बचाने आहली नेई खाने आहली आं। फ'ले दा बच्चा-बच्चा मिगी गौ'ड बंगालन आखदा ऐ।”

बेसहारा कास्तू दी अनथक सेवा दे बदलै च कांसू उस्सी अपनाइयै उसदा म्हेशां आस्तै सहारा बनना चांहदा ऐ। बे-सहारा कास्तू बी बे-सहारा कांसू दा सहारा पाइयै अपने अभाव दी पूर्ती करना चांहदी ऐ। दोऐ बेसहारे इक दुए गी पाइयै इक दूए दे पूरक बनी जाना चांहदे न। इस बारे च कांसू दी एह उक्ति मती गै समयानुकूल ऐ:- “माहनू गी माहनू दा सहारा। मिगी बी सिर खट्टनेगी कुतै कोई ठकाना नेई ऐ। जे हून तूं बचाया ऐ, तां सिर बी खट्टनेगी ज'गा दे।”

पर जीवन कोला नराश कास्तू ते हून आत्म-विश्वास बी गुआई चुकी दी ऐ-“माढी सिन्दिया विधना ने सन्दूर नई सुवा लिखी दी ऐ। सो जि 'दरा-जि 'दरा लंघनियां उ 'ददरा-उ 'दधरा उड्डरै दी ऐ।” किन्तू कांसू द्वारा आतम विश्वास ते आतमीयता भरेआ दलासा देने कन्नै उस्सी अपनी मानवोचित कमजोरी दा इक बारी भिरी शकार होना पौंदा ऐ। खीर कांसू ते कास्तू दा ब्याह होई जंदा ऐ। कास्तू दे इस त्रीए ब्याह दे बारे च ग्रं च घर-घर चर्चा होन लगदी ऐ। उद्धर जगतू बरोआला बिच-बिच सुरगल देवते दा अपने च प्रवेश होइयै भार पौंने दा पखंड रचियै भविक्ख वाणी करदा ऐ जे कास्तू इक दिन अपने त्रीए पति दा क्लेजा बी खाइयै गै छोड़ग।” पर इस बारी ते उसदे कन्नै धोखा किसमत ने नेई बल्के खुद कांसू ने गै करी दिता हा।

कास्तू दा स्हार इकलौता पुत्तर बमार होई जंदा ऐ। कास्तू बच्चे दे चांदिये दे कंडनू तुआरियै ते उसदे चा इक घुंगरी कडिडयै बाकी कांसू गी देइयै आखदी ऐ जे “इ'नेंगी बेचियै दुआ लेई आओ।” कांसू चली जंदा ऐ। मता चिर इंतजार करने दे परेंत जिसलै कांसू नेई औंदा तां बच्चे दी बमारी गी दिक्खियै कास्तू घबराई जंदी ऐ। खीर च दुआऽ नेई मिलने करी बमारी होर बधी जंदी ऐ ते बच्चे दे प्राण गै लेई लैंदी ऐ। इस चाल्ली कास्तू दे दिलै च अपने बच्चे दा लाज करवाने दा पछतावा गै रेही जंदा ऐ।

कांसू पासेआ विश्वासघात ते बच्चे दी मौत दोए घटनां कास्तू उप्पर इक भँकर वज्रपात दा कम्म करदियां न। स्हारा पाने दी कास्तू दी कोशश दी एह आखरी असफलता ऐ। हून ओह इस दुनिया च बिलकुल गै बेस्हारा ऐ। हून उसदा इत्थें कोई नेई ऐ, बिलकुल कोई नेई। ओह हून इक नि'री खंडरता मात्तर ऐ। ओह लटोई-पटोई दी ऐ। “चिड़ी दा बोट म्हेशां लेई सेई गेआ। कास्तू दा आहलड़ा, आसरमां ते ममता उज्जड़ी गई।”

दूए दिन कांसू दी मौती दी खबर बी कास्तू गी मिली जंदी ऐ। किसमतू दी मारी दी कास्तू पर हून बी निर्देई समाज गी तर्स नेई आया। कास्तू उप्पर बदकिसमती दियां चोटां जगतू बोरोकाले दियें कथित भविक्ख वाणियें पर सच्चाई दियां मोहरां साबत होंदियां न।

इस थमां परेंत कास्तू दी दिन चर्या दी शुरुआत अपने न्याने दी समाधि उप्पर पत्तर बछाने कन्नै होंदी ऐ। उसदा विश्वास ऐ जे इ'यां करने कन्नै समाधि दे अन्दर बच्चे दे कोमल शरीरे पर गर्मी दी कड़कदी धुप्पा दा असर नेई होग।

इक दिन पत्तर त्रोटदे होई उसी झाड़ियें चा इक तित्तरे दा बच्चा मिली जंदा ऐ। बस डुबदेगी तिनके दा स्हारा मिली गेआ। कास्तू इस संसारे च हून इक बारी फही किल्ली नेई ऐ। ओह उस तित्तरे दे बच्चे गी अपने स्वर्गीय पुत्तर कौडू दा गै प्रतीक समझियै उसदा नांऽ बी कौडू गै रक्खी दिंदी ऐ। ओह अपने पुत्तरे दे कंडनूएं दी ओह घुंगरी धागै च परोइयै उसदे गल पुआई दिंदी ऐ। मौके-मौके पर उसदे दिलै च कौडू दे बारे च केई अरमान ते कल्पनां औंदियां न। ओह कौडू दे ब्याह दे मौके पर सस्स ते उस दे बच्चे होने पर दादी

बनने दे दिनें दे सुखने दिखदी ऐ। एह सब सोचियै उसदे दिलै च बड़ा गै नंदै ने भरेदा चुलबुलापन लैहरां मारदा ऐ। कदें-कदें ओह उस्सी संबोधत करियै- “पुत्तरा, आऊं बी इक पक्खरूआं। पता नेई कियां भलेखे नै विधना ने मिगी मनुक्ख-जूनी बिच सुट्टी उड़ेया। पर मनुक्खें मिगी अपनी बरादरी बिचा छेके दा गै रक्खेआ। मिगी नां गै उड़डरन दित्ता ते नां गै टुरन दित्ता।”

किन्नी गैहरी पीड़, बेबसी ते किन्नी खिंझ ऐ समाज वास्तै कास्तू दे इ'नें शब्दें च।

इ'यां इस कहानी च नायिका कास्तू लगातार संघर्ष करदी होई अपने दुर्भाग दियां चबेड़ां बरदाशत करदी चलदी ऐ ते अपने लक्ष्य पासै कदम बधाने कोला बिंद बी डरदी नेई ऐ। ओह बरोधी परिस्थितियें दे अगैं झुकदी नेई बल्के उं'दा मुकाबला करदी जंदी ऐ। अपने चबक्खें बरोधी लोकें दे समाज कन्नै घिरी दी ओह नां कुसै कोला दया दी भिक्ख मंगदी ऐ ते नां गै कुतै नस्सियै चली जंदी ऐ। इस कोला उसदे चरित्तर दे धीर्ज, कर्मठता, आतम-विश्वास बगैरा गुन उभरियै स्पष्ट होई जंदे न।

संदर्भ :

1. शीराजा (हिन्दी) नरेन्द्र स्मृति अंक, मार्च 1972, जम्मू कश्मीर कला, संस्कृति एवं भाषा अकादमी जम्मू पृ०92
2. उ'ऐ पृ०- 92
3. उ'ऐ पृ०- 55
4. उ'ऐ पृ०- 94
5. उ'ऐ पृ०- 94
6. उ'ऐ पृ०- 94-95
7. उ'ऐ पृ०- 95
8. उ'ऐ पृ०- 95
9. उ'ऐ पृ०- 95
10. उ'ऐ पृ०- 96

\*\*\*